

EBÈLÙ, NSHAPÌTÀ MWIBÌDÌ 1



...?...ùvwa kaaba aka mu kàlaasà ne musànkìle... [Katùpà kàà mukàbà wà mèyi munda mutupù—Muf.] Nenku mpindyewu Mukàndà wà kumpàlà wà Ebèlù, m'Pòlò, mutwàsangànyì, anyì mutùdì twitabuuja. Beena tèlòlǝjì mbashiikìle; kǝ mbamanyè anu ne bwalu bùdì cinyì, anyì udi muWùfùnde nganyì to. Kàdì, mèmè ndi ngeela meeji ne, muntu kanà yònsò udikù ne ndambù wa dìjìngulula dya nyuma ewu's mmufwànyine kumòna ne m'Pòlò. Cìtu—cìtu ciitabùùjìibwe, kùdì bààbùngì bàà ku bafùndì ne, m'Pòlò. Ne mùdiye . . .

² Mu nshapìtà wa kumpàlà, twàsangànyì ne cìvwa dizànjika dya Mukalenge Yesu. Kaa, mushindu wùdiye mutòòkèshe, bwa kuleeja ku—ku dilabula dyàkenzàye mu njila wa ku Damàsèkè adi. Mpindyewu, Pòlò awu, anu kwine kwònsò aku, ùvwa mwena tèlòlǝjì wa menemene. Pòlò wàkalongeshiibwa ku makàsà a Gàmaalièlè, umwe wa ku balongeshi bàà batàmbe bwìmpè bàà mu ditùkù adi. Ne ùvwa ne meeji matwè ne lungènyì lwà dikèma, ne ùvwa mumanyi wa dibàla mupilùke wa Bible.

³ Nenku ndi musangàne eci ne, pàvwaye mu njila mutàngile ku Damàsèkè, ne mikàndà ya njila mu mpaaya, bwa kuya kakwàta bònsò bàvwà mu njila mubènèshìibwe wa kale wa Evanjeeliyo awu, cibì muntu awu ùvwa ne meeji matòòke. Kàdì, ntu misangu yònsò anu ngeela meeji ne kacya anu Pòlò wàmòna Stèfanò ùfwa, ngeela meeji ne aci cìvwa ne cya kwikala cimupìcìle. Pààkiitabàye lufù lwà Stèfanò, ne kulamayè binkutu bya bàvwà bàmwàsà mabwe abi, dǝbà adi Pòlò ùvwa mupìile bwa mashi a Stèfanò. Nenku wàkatonda, wàmba ne: “Ncyèna nansha mukùmbànyine to,” yèyè ne, “bwalu ndi mwelè mashi panshì, a mufwìle diitabuuja Wendè—Wendè, Stèfanò.” Bwalu, wàkacìjaadika.

⁴ Ne paùdì ujaadika bwalu, udi ne dipìilà dya mwomùmwe anu ne dya mwabanyanganyì wabù. Pa nanku patùdì tujaadika, twamba ne: “Kaa, eyowa's, kabivwa bikèngela kwikalabò benzè eci, *cikampànda* eci to,” wadìmuka bwa cyùdì wamba aci, bwalu udi mupìile bwa mùyaaya ne dilumbulwisha dyebe amu. Pawìkalà kùyì mwa kwangata dipàngadika to, kwàmbi cintu to, cilekèlè anu nanku. Dǝbà adi paùdì ujaadika mùdì mwena Kilisto, dǝbà adi's udi mupìile. Nwamònu anyì? Udi mupìile bwa kwikala mwena Kilisto, ne wèwè udi ne cya kwikala ne nsòmbelu awu. Ne pàdì Nzambi ùfila mu—mulayì mu Bible . . . Ndì mmòna muntu mulùme kaaba aka mu dikalù dya balèma. Pàdì Nzambi ùfila mulayì, mMupìile ku mulayì awu pàdìYe kàyì ùWùfikisha ku dyanzeka to. Nzambi mmupìile pàdìYe ùfila mulayì. Ne Mifùndu mmipìile too ne pàdìYi yùla. Nwamònu anyì? Yìdì—Yìdì anu kaaba aku bu—bu dìyì pàdì nanku didì

Nzambi mwambè. Nenku bikèngela Yùlè anyi Nzambi ngudi mupiile. Nwamònu anyi?

5 Ki Pòlò pèndè, mwikàle mulongeshi, ne wènda ùlwa mu njila mutàngile ku Damàsèkè diine ditùkù adi, lwà pa, bu pa nkànkalà, ngeela meeji. Kufùmakù Bukènkè bunene mu Maulu, ne kumufomijaBù, ne yèyè—yèyè kupòna panshi mu malaba. Ne kwambayè ne ùvwa muswè kumanya ne ùvwa Nganyi. Kwambayè ne Dìyì dyàkaakula, dyàmba ne: “Shawùlà, Shawùlà, udi uNkèngesha bwa cinyi?” Ngeela meeji ne nshapità wa 8 wa Byenzedi.

Ki yèyè ne: “Ùndì nkèngesha Nganyi?”

6 Ki Dìyì kwalukilaDì, dyàmba ne: “Ndi Yesu.” Kakaa! “Ndi Yesu, ne mbikolè bwa wèwè kukàndamana.” Nenku Yesu ùvwa cinyi dîbà adi? Yesu, Ùvwa Bukènkè, anu Bukènkè bunene bwikàle bùkenka bùbalakana.

7 Mpindyewu bwa kutùkolesha ku mwoyi ne kupeta nshiindameenu kaaba aka. Mmunyi mùvwàYe Bukènkè, Pèndè Muntu? Mpindyewu, muntu nansha umwe . . .

Kùvwa musùmbà wà màsàlaayi mwendè ne Pòlò, balami bàà ku ntempèlù, bàya bwa kakwàtangana. Pòlò nguvwa kàpìteenà munene. Nenku bàvwa bàya bwa kakwàta bantu abu, bwa tùmpanyè twàbò ne bikwabo, ne bwa ditèkemena dyabo dya butèndeledi divwà disanganyiibwà munda mwabo.

8 Kàdi, mpindyewu, ki Yesu nyawu's bu Bukènkè bunene. Mpindyewu, nwènù bavùlùke, ku cibangidilu, Yesu ùvwa Bukènkè. Yesu ùvwa Logos wàkapàtuka mu Nzambi awu. Ne Yèyè ùvwa . . . Ùvwa Mwanjelo wa Cipungidi wàkalombola bàna bàà Izaleela mu cipèlà awu. Ne Ùvwa Dikunji dya Kapyà divwàbò bàtàngila adi. Ne Ùvwa . . . Ne pàvwàYe pànu pa buloba, Wàkamba ne: “Ndi mufume ku Nzambi, ne Ndi ngaalukila ku Nzambi.” Nenku piikalàbi ne Yèyè wàkafuma ku Dikunji dya Kapyà, kubwela mu Muntu, pashiishe piikalàbi ne Yèyè wàkaalukila kùvwàYe aku, Wàkaalukila cyàkàbìdi ku Bukènkè. Nenku's ki Yèyè awu pààkaMumòna Pòlò apu, Ùvwa Bukènkè.

9 Mpindyewu, màsàlaayi ònsò àvwà ne Pòlò awu kaàkamòna Bukènkè abu to. Nenku bìdi mwa kwenzeka bwa muntu kuBùmònayè cibì bakwabo kabàyi bàBùmòna anyi? Cya bushuwa's. Eyo. Yèyè, Pòlò, wàkaBùmòna, kàdi bakwabo abu kabààkamòna Bukènkè abu to.

10 Mpindyewu, pàvwà Peetèlò mu bùlokò, tudi tusangana ne Bukènkè ebu bwàkabwela mu nzùbu wa lukànu amu, kukàngula biibi. Kàdi yèyè ùvwa . . . Bukènkè abu bwàkafofomija balami bakwabo abu, pàvwàbò bènda bàpàtuka apu, pàvwà Peetèlò wènda ùya apu. Kàdi mmwenzè anu ùfika ku ciibi, kudikàngukilaci nkààyaaci, mu cimùmà, kudikàngaci paanyimà pèndè. Kuumukila anu munda nwa nzùbu wa lukànu amu,

kuyayè too ne ku ciibi cya pambèlu. Kudikàngukilaci, kudikàngaci mu cimùmà. Ki pashiishe kuyayè ku mushikù wà mbèlu aku, kupàtukayè mu mùsèèsù wà mu cimenga. Ki kudikùpulayè kwìsù, byenzè bu udi wamba ne: “Mvwa ndòòta anyi?” Kàvwa mumanyè ne ncinyi cìvwà cyenzèke to. Kàdi, Mwanjelo wa Mukalenge, Mwanjelo umwèumwè uvwa Dikunji dya Kapyà dyàkendà ne Mòsà too ne ku mbù ne kumupandululadi awu, kaa, ki Mbù Mufwè awu. . . Mbù Mukünze kwenzayè bimanu ku nseke yònsò yibidi, ne Izaleela kusabukayè.

11 Ne pàakafikàbo ku Yadènè uvwa mùle ne mu malèngè awu, Yèyè kààkaDìvwija wa bàmona to. Kàdi Yèyè's ùvwakù, bwalu Wàkamukàngula. Ne bàakasabuka mu ngondo mwinâyì, mùdi bibandabanda byùle byònsò tètè ne màyi amu. Ki kwimanyikaYè musilù, ne kwimanyikaYè nèjè bwa kènguluku to, bwalu kabyàkatunguunuka ne kulepesha bimanu to, byàkiimana anu cyanààna. Ki Yehowah wetù twètù nyawù. Ki Yesu Kilisto wetù twètù nyawù. Kwimanabi anu cyanààna; ki kusabukabò bènda mu buloba bùme.

12 Mpindyewu, Nzambi ùvwa mulayè ne Yèyè ùvwa mwa kutàngila bwalu bwabo, pa nanku Ùvwa muswikibwe ku mulayì Wèndè. Mpindyewu, Pòlò, mumòne bintu ebi, ne mubimanyè, wàkapeta dyèsè, bwalu Nzambi ùvwa wàkula buludi ne Pòlò. Kàvwa wàkula ne màsàlaayi àvwà nendè awu to. Ùvwa wàkula anu ne Pòlò nkàayèndè.

13 Mpindyewu, pàaka—pàakapwekà Mwanjelo wa Mukalenge, mu mmwènekèlu wa mutooto apu; ne bajooji bàà mitooto, beena meeji bàà mu Inde abu, dībà adi, bààkamòna Mutooto awu ne kuWùlondabò ntàntà wa nkàmà ya kilòmètà. Kàdi Wòwò wàkopicila kumutù kwà nzùbù yònsò wa dijoojela, bwalu bàvwa bàmanyina dībà ku mitooto. Nenku muntu nansha umwe kààkamòna Mutooto awu to pa kuumusha beena meeji abu. Kaa, ekèlekèle! Aci kacyèna cìnùsalulakù myoyi anyi?

14 Dībà di, nudi numòna's, Nzambi kèna wàkula ne malongolodi to. Kèna wàkula ne bisùmbù bya bantu to. Ùdi wàkula ne bantu-nkààyà. Ùdi ùDìbuulula kùdi bantu-nkààyà. Nenku mpindyewu—mpindyewu bwa kwamba ciine eci, kacyi eci. . . Nzambi mmumanyè mwoyi wànyì. Nenku ncyèna ngamba eci bwa bwànyì mèmè mwine, bwa butùmbì bwànyì mèmè mwine to; mpindyewu, anu bwalu mvwakù. Kàdi, nuvwakù bamanyè ne, Nzambi umwèumwè awu, Yesu umwèumwè awu, ùdi neetu mu dinda emu anyi? Nudikù bamanyè ne, yònsò wa kunùdi ùdi ne kaabujaadiki kakese, kàà sungasunga kàà bwalu abu mpindyewu mene ne, Yèyè ùdi kaaba aka anyi? Ne ùdi. . . Yèyè mmutwènzèle cintu kampàndà mu ditùkù edi cìtùYe kàyi mwenzè mu matùkù makwabo to; Yèyè mmuDikwàcishe fòtò mu ditùkù edi. Tudi Nendè mukùdika *pàapa* nàka mene. Nwamònu anyi? Dikunji dya Kapyà, Mukalenge Yesu umwèumwè awu's.

15 Tàngilààyi nùmonè mùdiYe ùkwàta mudimu mpindyewu. Yêyè mwikàle Mukalenge Yesu umwèumwè awu, s'neÈnzè bintu bimwebimwe abi, bwalu Bible mmwambe ne: “Yêyè ùdi umwèumwè awu makèlèlà, leelu, too ne kashidi.”

16 Mpindyewu, kumpàlà kwa Pòlò kumanyishayè ní ncinyi cyònsò, bwa ne cyòci eci cìvwa cya bushuwa anyi cya mafi, wàkanji kuya mu Èjipitù ne kwenzayè bidimu bisatu, bwa kujandula ní cìvwa cya mu Mifùndu anyi to. Nuvwakù bamanyè nanku anyi? Paanyimà pàà dikùdimuna dya mucimà dya Pòlò, wàkaya mu Èjipitù ne kwenzamù bidimu bisatu. Kusòmbelayè muntwamu, ne mwòmò amu ki mwàkayiiilàye lungènyi lunene elu.

17 Mpindyewu, kî ndipàlakaja to nansha kakese, ndi mèmè nnùpèsha anu mùdi Nyuma Mwîmpè mucikàle ùshààla anu umwèumwè awu. Mpindyewu, ekeleeziya wanyì ewu mmuvùlùke ne, kùkaadi bidimu, pàvwà Mwanjelo ewu ùmwènèka ne wàmba maalu. Mèmè mvwa nCyèla mpatà ndambù. Nudi bònsò bamanyè nanku, nwènù bàà kale abu. Nwènù...Ní ncyà bushuwa, ela cyanza muulu, paùvwà muumvwè. Eyowa. Tàngilààyi, tàngilààyi ekeleeziya, ne leelu, bàà kale abu. Nwamònu anyi? Mvwa ngeela mpatà, bwalu bayiishi bàvwa bàngambila ne nCya dyabùlù. Nenku mvwa mucitàbùùje mu mushindu kampànda, kàdi kwindila. NcyàkambaPù cintu nansha cìmwè to.

18 Kàdi, kaa, Dìna dya Mukalenge dibeneshiibwè's wè! Dilòlò kampànda, kuntu kwàka, Yêyè kupweka, Mwanjelo, ne kuCìbuulula mu Mifùndu ne, ùvwa n'Yêyè. Nenku pàngààkaCimònà mu Mifùndu, dîbà adi ki kuya kaCikòbola pa buloba bujimà, Mukenji awu's.

19 Kwòkù aku kupàtukakù Oral Roberts, A.A. Allen, Tommy Osborn, Tommy Hicks, ne bakwabo kabidi. Nwamònu anyi? M'Mukenji mutùmina bantu.

20 Ne Yesu ùdi umwèumwè awu makèlèlèlà, leelu, too ne kashidi. Ncyà mu Mifùndu, Yêyè ùdi umwèumwè awu. Ùdi wènza cyòci cimwecimwe aci. Yêyè ùdi umwèumwè awu. Ne Ùdi ùkwàta mudimu mushindu wumwewumwe awu. Ùdi ùDimwènèsha umwèumwè awu. Ne Ùdi kaaba aka, mu dinda emu, umwèumwè awu. Mpindyewu tudi mwa kuMumòna; tudi mwa kupanga kuMumòna. Cyònsò cidìku aci, tudi ne bujaadiki mpindyewu mene ne Yêyè ùdi kaaba aka.

21 Mpindyewu, tudi tusangana mpindyewu ne, Pòlò, pa dilabula edi, ne mu difùndà dya mikàndà eyi, yàbùngi ya ku yòyi, mifùndila mu nzùbù wa lukànu, yêyè wàkapàlakaja Dipungila Dikùlukulu ne Dipyadìpyà. Mpindyewu vùlukààyi ne, mufùndi wa ndekeelu wa Bible ewu, ku disonsola, Nzambi wàkapweka ne kumwambila ne: “Muntu nansha yêyè nganyì mudìdinge anu musàkidileKù kantu anyi muumùshileKù kantu,

Ki bwa cinyi bivwa bikèngela bwa twètù kutàmba kutèya ntèmà ku maalu atùdi bumvwè, . . .

28 Nshapità mwi2, mpindyewu, tudi tubanga.

Ki bwa cinyi bivwa bikèngela bwa twètù kutàmba kutèya ntèmà ku maalu atùdi bumvwè, bwa . . .dìbà kanà dyònsò katwikadi twàlwa kuàlekela àfnuka àya.

29 Kaa, Nzambi anùbwejèku aci munda mu tabernacle ewu mu dinda emu. Ndi ndòmba bwa Nyuma Mwimpè àbwejèku aci mu ndòndò wa myoyi yenu. “Bivwa bikèngela bwa twètù kutàmba kutèya ntèmà ku maalu atùdi bumvwè.” Bivwa bikèngela bwa twètù kwikala bantu bàà mushindu kaayi, patùdi tumòna Yehowah munene útùluka wènta bintu bidìYe wènta ebi, ne twètù tubimòna bipàlakaja, Mufundu ne Mufundu, bwa ne m’Bulelèlà? Kàdi tudi misangu mikwabo tushààla basòmbè bu musàndà pa citùpà cya mucì, ne biikàle anu bwalu kabùyikù bütütàngila to. S’bivwa bikèngela twètù kwikala badifile ku mudimu, ku kasunsa ne ku kasunsa, tuteeta bwa kufikisha bantu kùdi Kilisto. Bivwa bikèngela twètù kwikala mabwe àdi ne mwoyi. Kabivwa bikèngela twètù kwikala ne lulèngù mutùdi emu nansha. Netùye mu ekeleeziya, ne netumònè Mukalenge Yesu wènta cintu kampànda, anyi—anyi útùbènesha mu mushindu awu, ne pashìshe twa—twalukila patùdi tUpàtuka apu kàdi twamba ne: “Disangisha dilenga dya dikèma’s.”

30 Mpindyewu, diyiiisha dya Dìyi, tudi tudisànkila, kàdi aci kî ncìdi citàmbe kwikala cya mushinga nansha. Kî ng’aci to. Kabivwa bikèngela bwa twètù kukuukwila Mukalenge anu patùdi tujikija kuyiisha Dìyi to, mutùtù twenza pa ciibidilu amu, anu kuMukuukwila cyanààna. Abi mbilenga be. Kàdi bivwa bikèngela twètù kwikala tuMukuukwila ku kasunsa ne kasunsa kàà nsòmbelu wetù. Patùdi ku mudimu, bivwa bikèngela twètù kuMukuukwila. Musangu wònsò wùdi mpùnga wùmweneka, kuukwilà Mukalenga mu kuMufidila kwa majaadiki.

Bu nwènù mwa kumona, bàmwè bàà kunùdi nwènù bainàbànza, udi omòna mukàji kampànda mu cilèma, kuukwilà Mukalenge pa kumwangata ne kwamba ne: “Mwanèètù wa bakàji, s’kùdikù nsòmbelu mwimpè kutàmba ewu nùnkù.”

31 Nwènù balùme ku midimu yenu, paùdi umvwa muntu útèèla Dìna dya Mukalenge citèèlàtèèlà, bwelèlà mwaba awu ùdìfindè ùye ku luseke, ùmukwàtè ku cyanza, wàmbè ne: “Wèwè, s’kùdikù nsòmbelu mwimpè kutàmba ewu nùnkù. Kabivwa bikèngela wèwè kwikala wamba mèyi awu to.” Kàdi kumwambilakù mu mushindu wà kalolo, wà musàngèelu. Bintu byònsò abi ndikuukwila.

Ne patùdi tumòna muntu kampànda ùsaama, ngàngàbukà wamba ne kakùcyèna kabidi cidì mwa kwenza to, bivwa bikèngela twètù kukuukwila Muukalenge pa kumwambila ne: “Kùdi Nzambi wa mu Dyulu utu wandamuna ku masambila.”

32 Ne dîbà adi patùdì tumòna bintu abi byènzeka, bitùdì bulelèlà tumòna byènzeka ne byènjiibwa ebi, kabìvwa bikèngelakù bwa twètù kulekela bintu abi bitùfinuka biya nansha. Twètù tutu anu tubilekela bitùfinukila mu minu. Ki lutàtù lùdì naalù ekeleeziya munene wa beena Mpenta leelu ewu ndwòlù alu. Mbalekèlè cya panshi pàà lwesu ciine cibàfinukila mu minu, pààbò bòbò's mbàvwà naaci mu byanza. Kàdi, tàngilààyi anu cyènjìbo, bènji anu mùdì mikwabo ekeleeziya's. "Mbaditwe lubilu mu buntòmbòj-. . .mu njila wa Koolà, ne mbabùtùke; ne njila wa Kaayinà, ne babùtùke mu buntòmbòji bwa Koolà."

33 Bàkaadi badìvwijè bulongolodi. Pamutù pàà kwikalabò ne bwànà bwetu mutùvwàku mwa kwikala bònsò cintu cìmwè, mbajuukè e kudìvwija bulongolodi. Mbenzè tuumalongolodi tukese tukese ne tusumbu, tubwayikile anu apu kàdi kukòsolola bwànà bwetu. Kàdi nwènù kanùyì batàngile bilenga to, ba-Presbytériens ne ba-Baptistes nebàcibàkùle, bwalu: "Nzambi ùdi ne bukolè bwa ku mabwe aa kujuudila Abraham bânà." Nenku tukàadi—tukàadi bacìlekèlè cìfinùke mu byanza bwa dikòsolokangana.

34 Mmuniyè mwàkajimijà ba-Indiens ditùnga edi kushàaladi dya batòòke? S'mbwalu bàvwa bakòsòlòkàngàne. Bu ne bàvwa badyènzè cìmùkù cinène cìmwèpelè. . .Kàdi bàvwa bòbò bàlwishangana munkaci mwabo. Nùnku mbalamè buloba bwabo bu ne bàvwa bònsò badisangè.

35 Twètù netùcìjimijè bìshi? S'mbwalu tudi bakòsòlòkàngàne. Mushindu wutùdì tujimija dilabula dyetu ne Nzambi, s'mbwalu tudi tukòsòlòkangana. Tudi tujuula kàmwè, tubiikila *aka* ne mba—ba-Méthodistes, ne *aka* ne mba-Baptistes, ne *aka* ne ng'Assemblées, ne *aka* ne mba-Unitaires, ne *aka* ne *ncikampànda cikwabo*, ne *église de Dieu*, ne ba-Nazaréens, ba-Pèlerins de la Sainteté. Tudi tukòsolola Mubidi wà Kilisto. Kabìvwa bikèngela twètù kwikalakù bapandùlùke to. Tudi bafwànyine kupangakana ku mmwènenu, kàdi twikalààyi bânà bàà muntu wa-tààtù-wa-mààmù. Ki cidì Nzambi muswè bwa twètù kwikala. Yèyè wàkafwila Ekeleeziya mujimà wa Nzambi. Nenku katwèna baswè kwikala bakòsòlòkàngàne nansha.

Mpindyewu *bìvwa bikèngela bwa twètù* kutàmba *kutèya ntèmà. . .bwa dîbà kanà dyònsò katwikadi twàlwa kuàlekela àfinuka àya.*

Bwalu pìikalàbi ne dîyi dyamba kùdì banjelo dìvwa dishìmàte, . . .

36 Nudi nuCyùm vwa anyi? "Pìikalàbi ne dîyi dyamba kùdì banjelo. . ." Mpindyewu, *mwanjelo* m'"mùsànjeelà." Mwakù *mwanjelo* wùdì wùm vwiya ne m'"mùsànjeelà." Twafùmu ku dicikenketa, mu mukàndà wà kumpàlà kaaba aka, "Nzambi, mu bikondo bya kale ne mu mishindu mishihilèshihilàngàne,

wàkaakwila ne baataatù kùdi bapròfetà.” Ki bàvwà baamisànjeelà bàà Nzambi. Ne bàvwa, piikalàbi ne bàvwa baamisànjeelà bàà Nzambi, bôbò bàvwa banjelo bàà Nzambi. Mùsànjeelà mmwanjelo; anyì, mwanjelo mmùsànjeelà’s wè.

³⁷ Mùsànjeelà! Wèwè udi mùsànjeelà, mu dinda emu. Wèwè udi . . . Wèwè udi mùsànjeelà wa luumù lwimpè anyì mùsànjeelà wa luumù lubì. Kaa, kî mbilenga anyì, bwa kumanya ne twètù tudi milòpò, ne tudi banjelo, baamisànjeelà bàà dibiikà dya ku lufù? Nenku tudi baamisànjeelà bàà Nzambi batùmina bàà pa buloba babiipe aba ne, Kilisto ùdi ne mwoyi. Mu myoyi yetu, Yèyè ùdi ne mwoyi. Mu nyuma yetu, Yèyè ùdi ne mwoyi. Ne Yèyè ùdi ùtùumusha ku nsòmbelu wa mpekaatu wa masandi ne wa ciipanshi, ne ùtùbàndisha kuulu, ne ùtùpèèsha “aleluuyah” mu musùukà wètù, ne ùtùvwija bifùkùibwà bipyabipyà. Tudi baamisànjeelà, banjelo bàà Cipungidi. Bilenga kaayi’s wè!

³⁸ Nenku mpindyewu, mu Dipungila Dikùlukulu: “Piikalàbi ne—piikalàbi ne dīyì dyamba kùdi banjelo divwa dishimàte,” mushindu awu bìvwa bìkèngela kwikaladi dilelèlè’s. Mu Dipungila Dikùlukulu, kumpàlà kwa dīyì dya mupròfetà kumwèneshiibwadi, bìvwa bìkèngela kukenkeciibwadi ne kujaadikiibwadi. Bôbò kabàvwa bàya naabi ne maalu ne kabòko-tekètà, mutùyaayà twètù naabi leelu ewu emu to.

³⁹ Kupàtuka anu cyanààna kuya kapeta disaluka dya mushindu kanà wònsò, anyì cintu cikwabo kanà cyònsò ne: “Kaa, butùmbi kùdi Nzambi’s wè, ki cyòci aci!” S’nudi batùpàkàne.

Bible mmwambè, ne: “Mu matùkù a ndekeelu, dyabùlù neàtentulè bwena Kilisto, bifwànàngàne anu menemene, mu mushindu wà ne nebìseeswishè ne Basungula mene bu byòbì mwa kwenzeka.” Ncya bushuwa. Pa nanku, tudi ne cya kubyèla ku diteeta.

⁴⁰ Kàdi bàvwa bàcyèla ku diteeta bìshi mu dyabo ditùkù adi? Ku Ulimà-Tuumimà. Cibwikilu cya pa cyàdi cya Aalònà, cìvwà ne mabwe awu mwómò aci: escarboucle, jaspe, mbongò, rubis, saafilà. Mabwe ónsò, àvwà àleejà dilediibwa dya bankambwà dikumi ne babidi aba awu, àvwa pa cibwikilu cya pa cyàdi cya Aalònà aci. Nenku pàvwà mupròfetà wàmba cipròfetà, ne Bukènkè bunsantu abu bùpenyapù, Nzambi ùvwa wàmba ne: “M’Bulelèlè.” Kàdi, nansha cyòci cìmwèka cilelèlè bìshi, cyòci kaciyi cìpenyapù to, kacìvwa Bulelèlè to. Pa nanku, Ulimà-Tuumimà awu wàkaya ne bwakwidi abu.

⁴¹ Kàdi Bible ewu ki Ulimà-Tuumimà wa Nzambi leelu. Nenku pàdi mupròfetà wàmba cipròfetà, kakùyì mpatà to cìdi ne cya kupenya pàmwè ne Bible. Dìbà adi, Nzambi ùdi wàmba, pashìishe Ùpweka ùCijaadika.

⁴² Kaa, mushindu mwine wùndiku mwa kutùmbisha Nzambi leelu’s wè! Nyewu ngaaluja meeji ku dikwabo dinda dya dyàlumingu, dyenzè mùdi edi nùnkù, pàmvwà nguumuka ku

tabernacle eku. Ne nwênù aba nuvwa nudila myadi nundòmba bwa nciyi to. Kàdì, piine apu, mêmè kuyiisha pa Davidi ne Ngoliyààtà, ne neùkungamanganè ne bantu bàdì bakwàtè mashikà ne kabàyi bàcyùka maalu, bàdì bàmba ne matùkù a bishimà àkaadi mapite bàba.

43 Mêmè kwamba ne: “Kùdi muntu munene wa mpolondo umwèpelè, ne patwikalà anu ne twâmushebèyèè, bakwabo’s nebàkolè mu mabòko.” Ki Mukalenge kucifilaYè. Ne pashiishe kulwakù Oral Roberts kampànda ne Jagers, ne bakwabo, kutùulabò Mwelè, ne twètù kulwangana ne mwena lukunà ne kumwipata mu ditunga, kubàbwikidija mukana. Kabèènakù mwa kwamba ne bishimà kabyèna byènzeka to, bwalu s’ki byòbì ebi byènzeka. Bushuwa’s. Dìyì dya Nzambi ndya Cyendelele. S’nDipenyè pa Ulimà. Dipenyè pa Dìyì, ki Ulimà-Tuumimà Wendè nyawu. Nenku pàvwàci cipenya pa Cyòci aci, cìvwa cilelèlà.

Nenku bwa ewu yònsò udi mu lukèngelu, piikalàbi ne wèwè udi ngènzàmpèkààtù, ukèba kumanya mwa kusùngidiibwa: “Itàbùùjà Mukalenge Yesu Kilisto.”

44 Leelu ewu, twètù’s tudi ne bintu bùngì cyanààna bìdì bìkèngelà bwa wèwè kwenza. “Bikèngela ùlekelè maalu a kale ùbangè mapyamàpyà. Bìkèngela wènzè *cikampànda* ne wènzè *cikansanga*, bwa wèwè kusùngidiibwa.”

Ndi mvùluka mulami wa nzùbu wa lukànù wa beena Filipò awu, pààkakonkà mulami wa nzùbu wa lukànù ewu Pòlò ne: “Ndi ne cya kwenza cinyì bwa kusùngidiibwa?”

Bu ne ùvwa ngwèwè anyi mêmè, nùnkù’s tudi bamwambile bintu bìvwà bìkèngelà *kubèngayè* kwenza. “Bìvwa bìkèngela ùlekelè kunwà maalà. Bìvwa bìkèngela ùlekelè dinàyà dyebe—dyebe dya twartà twà mfrangà adi. Bìvwa bìkèngela ùlekelè *cikampànda*. Bìvwa bìkèngela ùlekelè *cikansanga*.”

Pòlò kààkamwambilàkù abi to. Wàkamwambila anu bintu bìvwà *bikèngela* kwenzayè. “Itàbùùjà Mukalenge Yesu Kilisto, nenku neùsungidiibwè.”

45 Mpindyewu: “Ewu udi umvwa Mèyì Àànyì ne wìtabuuja Ewu udi muNtùme ùdi ne Mwoyi wà kashidi.” Ki dipenya dya Ulimà-Tuumimà ndyòdì adi, Yone Munsantu 5.24. “Mêmè ki Mukalenge udi wondopa màsaamà èbè ònsò.” Yakòbò 5.14: “Nùbiiikidishè bakùlù, bàmulaabè maanyì, disambila dya diitabuuja nedisungilè mubèèdì awu.” Dipenya dya Ulimà’s. Nwamònu anyi? Ki Dìyì dya Cyendelele dya Nzambi ndyòdì adi.

46 Nansha kujuukè bantu bàdì bàbènga kwitaba diikalakù dya Nzambi, beena dyabùlù, bàdì bapangè kumanya ne Nzambi ùdikù, beena mpatà bùngì munyì. Nzambi neàtwe ku cya Dìyì Dyèndè. Yèyè mmulayè ne ki cìvwàYe mwa kwenza.

47 “Ne bivwa bikèngela twètù kutàmba kutèya ntèmà ku bintu bitùdi bumvwè ebi, bwa díbà kanà dyònsò katwikadi twálwa kubilekela bífínuka bìya. Bwalu pìikalàbi ne mèyì mamba kùdi banjelo (bapròfetà) àvwa mashimàte...” Àvwa nanku anyi? S’tudi bafwànyìne kupicishila lumingu lujima pòpò apa.

48 Dìvwa dishimàte pàakakulà Mòsà anyi? Ncya bushuwa ne mmùvwàdi.

Kàdi bìshi bwa Eliyà, musòmbe pamutù pàà mukùnà pààpa? Mukalenge mumwàmbe ne: “Bànda kuulu kwàka, Eliyà. Nènshaalèku neebe; muswèku ndambù wa bwobùmvwè.” Nzambi ùtu muswè kwikala mu bwobùmvwè ne bantu Bèndè. Kàdi twètù katùtukù baswè kushààla bapùwe ntàntà bule bukùmbàne bwa kwikalaYè neetu mu bwobùmvwè to. Tutu tudifila bikolè ku ditùpikatupika, kuumuka apa kuya pàapa, ne byàbúngì bya nanku. “Sòmba tàlàlà, Eliyà.” Ùvwa muswè bidimu bisatu ne ngondo yisambombo bya bwobùmvwè. Twètù katwèna mwa kuMupèeshakù tusunsa tusatu to, mbikolè. Bidimu bisatu ne ngondo yisambombo bya bwobùmvwè kacya anu bwàngatangana. Kaa, mèmè ndi munangèpu nanku’s wè! Yèyè ne: “Kùditàcishi wèwè bwa diipika to; abi netwikale naabi bìmana kulongolola. Bikòlolò nebikudiishè. Ne byònsò nebiikale anu bilenga. Cìndi Mèmè nkèba cìdi anu mbwobùmvwè cyanààna.” Mupròfetà mukùlàkàji ewu, Eliyà, musòmbe kumutù kwa mukùnà kwàka, pàvwàye mu bwobùmvwè ne Nzambi apu, mòna’s, kàpìteenà awu kwambayè ne: “Ngeela meeji ne nèmbandèku nkamwàngatè.” Mpindyewu, kùteecikù kunyanga bwobùmvwè abu to.

49 Pa nanku, kàpìteenà awu kulwayè, ne cilwilu cyèndè cinènè cya bantu aci, makumi ataanu. Ki yèyè ne: “Ndi—ndi—ndi mulwe bwa kukwàngata, Eliyà.”

50 Ki Eliyà kujuukayè. Dìmukà wè, s’mmupròfetà wa Mukalenge ewu! Yèyè ne: “Ní ndi musadidi wa Mukalenge, kapyà kàtuulukè mu dyulu kànùbùtùlè.” Ki kapyà kutùulukakù. Kapìteenà awu kwambayè. . .

51 “Kaa, udi mumanyè cìdi bwalu anyi?” To, mfùmù’s wè, kwambayè ne: “Aci pàmwàpa cìvwa nnkù—nnkùbà, anu mukenyi cyanààna mupicìlepù’s, ki wùdi mubàtuutè. Nèntumè bakwabo makumi ataanu.”

52 Eliyà kujuukayè, umwe wa ku banjelo’s, díyì dyèndè ndishimàte. Ùvwa ne cya kwikala difutu dyakànyìne bwa byònsò bìvwa byenjiibwe bibi. Yèyè kwamba ne : “Ní ndi musadidi wa Mukalenge, kapyà kàlwe.” Ki makumi ataanu miibìdi awu kwoshikawù. Eyo. Difutu ne difutu dyònsò’s!

Bwalu pìikalàbi ne díyì dyamba kùdi banjelo dìvwa dishimàte, ne dishipa dyònsò dya mikenji ne cishikù byàkapeta difutu dyakànyìne. . .

53 Mpindyewu, cintu cinènè ncyòcì eci, mvensà udi ulonda awu.

Mmunyi mutwàpàndukà, . . .

54 “Mmunyi mutwàpàndukà?” Piikalàbi ne díyi dya mukana dya Eliyà dyakatwàla kabùtù, bwalu yèyè ùwva mwanjelo wa Mukalenge, mmunyi mutwàpàndukà pàdì Díyi dya mukana dya Kilisto dyàkula kuumukila anu ku ntwàdijilu ne ku ndekeelu? Anyi, mmunyi mutùdiku mwa kupangila pàdìbo bàkusambidila, piikalàCi Díyi dya mukana dya Kilisto? Piikalàbi ne Kilisto ngudi mutùmine Ekeleeziya Wendè díyi bwa kusambidila babèèdì, ne Ekeleeziya wènza cidiYe wàmba ne Yèyè. . . bwa bôbò kwenza aci, dîbà adi mmunyi mùdìCikù mwa kupangila’s? Nansha. Wèwè ngudi mwa kupangila, kàdì Dyôdì kadyèna mwa kupangila nansha. Ne bu mùdìbi anu ne wèwè udi muDilamè, neDìye neebe too ne ku ndekeelu.

55 Wèwè mupangile, udi mupangile ngwèwè nkààyebè. Cyùdì udi anu mupàmbùke ku Díyi cyanàànà. Kàdì paùdì anu ushààla ne Díyi, kaDyèna mwa kupangilakù to. Bwalu díyi dya baprófètà dyàkenza *cikampànda*, ambààyaaku tǔng mwàpangà Díyi dya Kilisto kwenza?

Mmunyi mutwàpàndukà, twètù balèngùlùle lupàndu bunene nùnkù, lùdì dyàmbedi lubangè kwambiibwa kutùdì kùdì Mukalenge, ne lutùshìndìkila kùdì aba bààkamutèèlejà yèyè abu,

56 Elàayi meeji ku Cyôci aci, lwamba kùdì Mukalenge. Mmisangu bùngì kaayi yitùdì bafwànyine kwalukila cyànyimà? Mpenyi patùdì bafwànyine kwimanyikila, apa mene bwa dîbà dijimà? Pààkalwà Yesu, Yèyè ùdì umwèumwè awu makeèlèlè, leelu, too ne kashidi.

57 Mpindyewu, vùlukàayi, dyàmbedi lwàkabangà kwambiibwa kùdì Yesu, Yèyè mwine, ne pashiishe lushindikiibwe kùdì aba bààkaMutèèlejà. Mpindyewu Mutèèlèjaayaaku Yèyè.

58 PààkalwàYe pa buloba, Yèyè kàakambakù mùvwàYe mwondopi nansha. Wàkamba ne: “Udi wenza byenzedi kí m’Mèmè to; n’Taatu Wanyi udi musòmbèle munda Mwanyi. Yèyè ngudi wenza byenzedi. Mwànà kèna mwa kuDyènzela cintu nansha cimwè to, anu cidiYe ùmòna Taatu wènza.” Yone Munsantu 5.19.

59 Tàngilàayi pààkalwà Filipò kùdìYe. Natànàèlè. . . Paanyimà pàà dikùdimuna dya mucimà dya Filipò, kuyayè kangata Natànàèlè. Yèyè ne: “Lwâ, kùmonè Utùdì bapetè ewu: Yesu wa mu Nazàlèètà, Mwànà wa Yözefù.”

60 Ki awu ne: “Nkufwànyinekù kupàtuka bwa nsongo mu Nazàlèètà anyi?”

61 Yèyè ne: “Lwâ, kùmonè.” Ki mushindu wà kutwishiibwa ngwòwò awu; kuCyèla ku diteeta’s. Lwâ ùmonè. Kaa, ki dyandamuna dya ditàmbe bwimpè dínkaadiku muumvwè ndyòdì adi. Lwâ ùdimwènè. Kushààdì mwimanyine pambèlu

bwa kudyudila ku luseke to, kàdi: “Nùteetè bintu byònsò, ne nùkwatè bikolè ku cìdì cìmpè.” Lwà ùmonè.

62 Kudítwabò mu njila, bènda bàyiikila. Mmwenzè anu ùbwela mu Bwikadi bwa Mukalenge Yesu, Yèyè kwamba ne: “Mònaayi mwena Izaleela mwena munda mùdì kamùyi budimù.”

63 Aci kàdi kumukòsaci mweyelu’s, pàmwè ne wònsò. Kukènzakanayè, kwambayè ne: “Ee, Laabì, Wèwè ukààdikù mummanyè dībà kaayi? Kacya Kùyikù mwanjì kummòna. Wàmmanyi munyi?” Filipò kwambaye. . .

64 “Kumpàla, pàakubiikidiyè. . .” Yèyè ne: “Kumpàla kwa Filipò kukubiikilayè, makèèlèlà awu, paùvwa mwinshì mwa mucì mwa mfigi apu, Mèmè’s mvwa mukumòne.” Amen.

65 Yèyè ne: “Wèwè udi Mwànà wa Nzambi. Udi Mfumu wa Izaleela.”

66 Mukàjì kampànda kubwelayè mu Bwikadi Bwèndè, ne Yèyè kwamba ne: “Ndà kangàte bàyeebè.”

Awu ne: “Ncyèna nendè bwalà.”

67 Yèyè ne: “Aci ncyà bushuwa. Ukààvwa naabò bataanu, ne ùdì musòmbè nendè mpindyewu awu kì ngwebè to. Wambì bulelèlà.” Anjì elààyibi meeji ku bwalu abu.

68 Awu ne: “Mukalenge, ndi njingulula ne Wèwè ewu udi Mupròfetà. Aci, tudi bamanyè ne pààlwà Maasiyà Yèyè ngwatwàmbila bintu byònsò.”

69 Yèyè ne: “Mèmè ki Yèyè awu, udi wakula neebe ewu.”

70 Ki kuyayè lubilu kambila bantu bàà mu cimenga amu ne: “Lwàyi, kanùmonààyi Muntu Udi mungambìle byònsò bìndì mwenzè. Kì m’Maasiyà awu anyi?” Cìvwa cyamba kùdì Mukalenge.

71 Cyàkenzekà ncinyi? Yesu wàkamba, kumpàlà kwa kuumukaYè ne: “Bintu bìNdì ngenza, nenùbyènzè peenu.” Mmwômò anyi? “Bintu bìNdì ngenza, nenùbyènzè peenu, nansha mene byàbùngì kutàmba ebi, bwalu Ndi nya ku Taatù.” Kaa, ndi mwa kubàmòna pàakayàbo apu, myaba yònsò. Maakò 16: “Bààkaya myaba yònsò, bènda bàyiisha; Mukalenge ùkwàta naabò mudimu, ùshindika Dìyi.”

Nenku kaaba aka, Pòlò, udi ùfila cintu cimwecimwe aci. Mmwambè ne—ne Evanjeeliyo wàkabanga kuyiishiibwa kùdì Yesu, ne wàkashindikiibwa kutùdì kùdì aba bààkaMutèèlejà Yèyè abu. Ki Dibwe dya Cishimikidi ndyòdì adi. Kaa, Dìnà dya Mukalenge dibeneshiibwè’s wè! Ki Dibwe dya Cishimikidi ndyòdì adi.

72 Ne pa kwela meeji ne, bidimu binunu bibidi byàpìci. Nkujuukè bàdì bàvila diikalakù dya Nzambi, ne beena dyabùlù, ne beena mpatà, ne bàdì bapangè kumanya diikalakù dya Nzambi. Kàdi, leelu ewu, Yesu umwèumwè awu ùdì ùshindika

Dìyì Dyèndè mu mushindu wumwewumwe awu kùdì aba bàdì bàMutèèleja. “KuMutèèleja,” kacyèna cyùmvwija anu kutèèleja diyiisha to. Mbwena kwamba ne, kuMutèèleja *Yèyè*. Eyowa.

⁷³ Mmunyì mutwàpàndukà? Dipànduka dyetu didi penyi? Kaa, wèwè udi wamba ne: “Nzambi àbeneshiibwè, mèmè ndi wa mu ekeleeziya wa ba-Méthodistes. Mèmè ndi Presbytériens. Mèmè ndi mwena Mpenta.” Aci kacyèna ne dipetangana naaCì nansha dikese to. Ne wèwè udi ukafika ku luseke ne muswè kuCibìikila ne “nditèndeleele dya bakishi, anyì lubùkù, anyì démon kampànda,” anyì cintu kampànda. Bundù bwàbò!

⁷⁴ “Pìikalàbi ne dìyì dyònsò dya kùdì banjelo dìvwa dishimàte. . .” Yesu wàkamba ne: “Kì. . .Katancì kakese, bàà pa buloba kabààkuMmòna kabidì to. Kàdi, nwènu nenùMmòne, bwalu Nèngìikalè neenu, munda mwenu mene, too ne ku ndekeelu wa cikondo.” Nenku patùdì tuMumòna ùtùuluka, bwa kutungunuka ne kushindika Dìyì Dyèndè, mmunyì mutwàpàndukà patùdì tunyeemena ku ekeleeziya kampànda, anyì ku bulongolodi kampànda, anyì ku dingumba, anyì kaadilongesha katùdì badikwàtàkàjile twètù biine ne tukèngeleka? S’mbipìciibwe ne wèwè mubilekèle. “Bwalu mpekaatu yònsò wàkapeta difutu divwà dyakànyine mu cikondo cya banjelo, kàdi ambààyaaku mwìkalàbi pàdì Mwànà wa Nzambi wàkwila mu Maulu, bwa kumwènesha Dìyì Dyèndè! Mmunyì mutwàpàndukà, twètù balèngùlùle lupàndu bunene nùnkù?” Kaa, ekèlekèle! “Nzambi kabidì. . .”

Mvensà mwi4:

Nzambi kabidì ùbàfidila bujaadiki, . . .

⁷⁵ Tàngilàayi eci. Mukalenge ùvwa ùfila majaaniki. Kaa, mèmè ndi ne disànkà dyàbùngì be bwa cyòci aci! Mukalenge ùvwa ùfila bujaadiki.

⁷⁶ Tàngilàayi. Pàvwa Eliyà musòmbe pa kakùnà apu, ne kwambayè ne: “Ní ndi mulùme wa Nzambi, kapyà kàtuulukè mu Dyulu kànùshidishè.” Nzambi ùfila bujaadiki ne yèyè *uvwa* mulùme wa Nzambi.

Nzambi ùtu misangu yònsò anu ùfila bujaadiki. Nsòmbelu webè neàfilè bujaadiki. Ncyèna mèmè mumanyè cìdì bwebe bujaadiki to, kàdi nsòmbelu webè ùdì wàkula ne dìyì dikolè, mu mushindu wa dìyì dyebe wèwè kadiyikù mwa kuumvwika to. Kàdi, webè—webè nsòmbelu, webè nsòmbelu wa ku ditùkù ne ku ditùkù’s neàfilè bujaadiki bwa cyùdì. Nzambi’s ùtu ùfila bujaadiki. Eyowa. Nyuma Mwìmpè ncitampì, ne citampì cìtu cyàngata nseke yònsò yibidi ya dibèji. Bàkumòna mùdì mwimàne *apa* ne bàkumòna paùyaayà. Kì ng’anu mu ekeleeziya to kàdi ku mudimu wà bwàcyàbwàcyà. Udi mutwibwe citampì mu nseke yònsò yibidi, munda ne pambèlu. Ku disànkà dyùdì naadì, ne ku nsòmbelu ùdì nendè awu, udi mutwibwe citampì, munda ne pambèlu ne, wèwè udi mumanyè ne

udi musùngìdiibwe ne bàà pa buloba mbamanyè ne udi musùngìdiibwe, ku nsòmbelu ùdi nendè awu, bwalu Nzambi ùtu ùfila bujaadiki. Dìna Dyèndè dya Cijila dìbeneshiibwè's wè! Ekèlekèle, ngàavu kuumvwa bwena Nzambi bwàmbwedì!

⁷⁷ Anjì elààyikù meeji ku bwalu abu, bânà beetu, mwaba awu. Kaa! “Mikooko Yànyì yìdi yùm vwa Dìyì Dyànyì, ne kayàkulondakù mwenyì nansha.” Kaa, mushindu mwine wùdì mènà ètù mafùnda munda mwa byanza Byèndè's wè! Didi kumpàlà Kwèndè, muumyà ne bufùku. Dìyì Dyèndè didi misangu yònsò kumpàlà Kwèndè, Mulayì Wèndè. Kèna mwa kuwùpwa mwoyi nansha. Ne Yèyè mmukunangè.

⁷⁸ Mpindyewu, Yèyè neàfidile Bèndè Yèyè bujaadiki. Wèwè kwakubuulula mukana bwa kwamba dīyì to, bàà pa buloba nebàmanyè ne cintu kampànda ncikwenzèkèle.

...ùfila bujaadiki, ne ku bimanyinu ne maalu a kùkèma, ne ku bishimà bishùlèshùlàngàne, ne mapà a Nyuma Mwimpè, bilondèshùle diswa dyèndè yèyè mwine dimpè anyi?

⁷⁹ Twànji twàngatàayi anu Mufùndù wùm wè cyanààna mpindyewu kumpàlà kwa twètù kujikija; mu Ditùkù dya Mpenta, pàakapetàbo Nyuma Mwimpè apu. Matùkù matwè ku anaayi paanyimà, Peetèlò ùvwa mupicìle mu ciibi ciwàbo bàbiikila ne Cilenga aci, yèyè ne Yone. Kwambabò ne: “Tùtàngilè,” bàmbila muntu mulùme kampànda. Ki kwambayè ne: “Nì ng'argent nì nngòlò mèmè ncyèna naabi to, kàdi cìndi naaci ncìngàakupèeshà. Mu Dìna dya Yesu Kilisto wa ku Nazàlèetà, juukà wèndelè kuulu.” Nénku muntu awu kubàndulukayè ne kààkeelakù lukonko pa bwalu nansha bùm wè to. Wàkajuuka anu cyanààna ne wàkayà wènda wènda. Bàvwa bantu bapangi ne kabàyi balongè mukànda to. Kàdi Bible mmwambè ne: “Byakakèngela bwa kutèyabò ntèma kùdìbo, bwalu bààkamanya ne bòbò bàvwa ne Yesu.”

⁸⁰ Mwanèètu, pàdi bàà pa buloba bàmanya ne wèwè uvwa ne Yesu, paùdi mwa kwikala ne nsòmbelu wa kàyi musopakaja mu cikondo cya mpindyewu eci ne mu mîdimà eyi, mu mushindu wà bàà pa buloba bàmanya ne bàfika ku dimòna ne wèwè uvwa ne Yesu; pàdi ndumba wetù wa kale wa mu musèsùsù muvwàle mbondya ne wa ciipanshì ewu, mwa kulwa inàbànzà, musukula mu Mashì a Mwànà wa mukooko; Nzambi's ùdi ufila bujaadiki bwa ne Yèyè ùdi ne mwoyi.

⁸¹ Angàtaayi kanwàyi, mwikàle wa ciipanshì bikolè mu mushindu wa ùkùtakaja mukàjèndè ùpàtuka ne bakwabu, mu mushindu wa ùkèngesha bânà bèndè, wàngata mfrangà ya kutèeka naayi byàkudyà pa mèèsà, ùya kayìnyangila kùdì ndumbà kampànda. Yèyè awu ànjì àtwilanganè anu ne Yesu musangu wùm wè, s'neumonè mùdiye wàlukila, mwàkenzà Legònà amu, wàkalwa ne lungènyi lwèndè mu lwòlò ne muvwàle

bilàmbà awu, kwàlukila kùdì bânà bèndè ne mukàjèndè ne bananga bèndè. Cya bushuwa's.

⁸² Kùkaadi cikondo kampànda, kùkaadi bidimu bitwè ku makumi anaayi, pàakadisangishà ntèdeleelu ya buloba bujima, ne bantu bashiilèshiiàngàne kujuukabò ne kwakulabò. Ki baaMùzùlùmanyi kwakulabò pa ntèdeleelu wa baaMùzùlùmanyi. Ba-Jains kwakulabò bwa ba-Jains; ba-Bouddistes bwa Bouddha. Kàdi docteur mukese awu, nyewu ngápù dìnà dyèndè mwoyi, bwa mpindyewu, pàanyi's mwva mumanyè dìnà dyèndè, kàdi dyämpù mwoyi's. Yèyè kwakula bwa kuleeja mpàla wa bwena Kilisto, ki kulondayè bwalu bwa Inàbànza Maccabée wa mu Oklahoma, mu Amerike.

Mukàjì awu ùvwa mukooyike wa dikèma ne nsòmbelu wa ciipanshi, mu mushindu wà ne nansha mene pàakayàbo bwa kumushebeya, kabàakaswàku nansha bwa kumulenga ne byanza to, ùvwa wa ciipanshi wa dikèma ne mubi wa nkòtòtò. Bávwa bamukwàcile bwa bwalu bùmwe ne: ùvwa unwa cifwankà; mwikàle wèndesha ditempu dya lubilu lupitèpìte; ne mushipè mi—mi—mikenji, biyè ne mwa nàka mu Oklahoma, pàvwaye ùpita mu mùsèesù, wèndesha ditempu dya tubalù tunaayi. Ne yèyè ùvwa mubi wa nkòtòtò ne manyaanù a dikèma mu mushindu wà bantu kabàyikù nansha baswè kuseemena pàvwaye ùsanganyiibwa to; mu mushindu wà ne, pàvwa bamushebeyi ne cya kumushebeya, kabàakaswà bwa kumwowa to. Bàakamupòngolwela anu kaabùdìmbù ne masàlà a nyuunyi pambidi cyaànà, bwa kumushebeya.

Kàdi pàakalondà muyiishi mukese ewu bwalu bwa mukàjì awu, mu mushindu wà ne, wàkafikisha bantu ku dishàala basòmbèle ku mibàngùbàngù ya bibàsa, bàtèeleja bwa kuumvwa ne ncinganyi ciwva cilondà. Mmwenzè anu ùfika ku ne: mubi wa nkòtòtò, ne manyaanù, wa ciipanshi, mu mushindu wà ne balombodi kabàvwakù nansha mwa kuswa kujimija dîbà nendè to, ùvwa wa ciipanshi be. Dyabùlù mwine wa mu iferno awu ùvwa mufwànyine kubènga muntu wa bwena awu, pàmwàpa, bwa mushindu mwine wàkalondayè bwalu abu's. Pashiishe kwambayè ne: "Nwènu balùmyànà bàà ntèdeleelu ya pa buloba, wenù ntèdeleelu ùdiku ne cintu kampànda cifwànyine kusukula byanza bya Inàbànza Maccabée awu anyi?"

⁸³ Bònsò kushàalabò anu vii. Dîbà adi yèyè kutuutakaja byanza, ne kutùpikayè muulu. Kwambayè ne: "Butùmbi bwikalè kùdì Nzambi! Mashi a Yesu Kilisto kaàkusukula anu byanza byèndè cyaànà to, kàdi neÀsukulè ne mwoyi wèndè ne àmuvwijè Mukàj'Èndè-musèla." Nyawù nzwàmbila's:

Ngàsà udi ukèmesha! Dîyì dipòle kaayi,
Dyàkasungilà mukèngeledi wa luse bu mèmè!

Kale wàwa mwya mujimine, kàdi mpindyewu
ngààpetèki,
Mwya mpofo, kàdi mpindyewu nkàadi mmòna.
Ngàsà nguwya mulongèshe mwoyi wànyì bwa
kuciina,
Ngàsà ngwâkuumusha bwôwà bwànyì;
Mushindu mwine wâkamwèka ngàsà awu wa
mushinga mukolè
Musangu wà kumpàla dîbà dîngààkiitabuujà's
wè!

⁸⁴ Cya bushuwa's. "Mmunyì mutwàpàndukà, twètù balèngùlùle cya nanku?" Wèwè mulèngùlùle kudya, s'udi ufwà. Wèwè mulèngùlùle kwela cibèndà, s'neujìwukè. Wèwè ulèngulula kukàma ngombe mabèèle, mabèèlè èndè awu's neakamè. Wèwè ulèngulula ménù èbè awu, nebikengelè bwa wèwè kuàtùùdisha ònsò. Cya bushuwa's. Neusunè údyâmbikè bwa dilèngulula dyebe dya maalu adi.

⁸⁵ Kaa, nwênù beena Branham Tabernacle ne nwênù beenyi, swàyi nnnwâmbilekù cintu kampànda mpindyewu. Nwênù nulèngulula bwa kufidila Nzambi bujaadiki, nwênù nulèngulula bwa kupa Nzambi luumù ne butùmbi, nenùdisangane nukàadi bakwàte mashika, ne mmwènekelu wa kwisùkwisù, ne batwè cìmpingà, dimwè dya ku matùkù aa. Pàayi Nzambi butùmbi. "Mmunyì mutwàpàndukà twètù balèngùlùle lupàndù bunene nùnkù?"

⁸⁶ Dîbà dyàyi. Ndi mfùma ku dimòna Mwanèètù Thom, wâbwelèdi paanyimà pàapa wàwa. Netùjikijè bwa kutùngunuka ne eci dilòòlò edi, bu Mukalenge mwa kwanyisha.

Twânjàayi kusambila katanci kakese cyaànà.

⁸⁷ Taatù wetu wa mu Dyulu, Kùdi kwikalè mabènesha, ne disaamuna, ne buneemè, ne butùmbi, ne lungènyi, ne ngulu, ne bukolè, bwa kashidi ne kashidi. Kaa, kùdi Mwânà wa mukooko udi musòmbe pa Nkwasa wa butùmbi wàwà, makòokeshi ne makalenge ne byònsò byâkafidiibwa mu cyanza Cyèndè. PàakabiikàYe ku bafwè, bwa dibingishiibwa dyetu, Wàkeela bàà pa buloba lubilà lukolè ne: "Bukòokeshi bwònsò mu Dyulu ne pa buloba mbifidiibwe mu cyanza Cyànyì. Nenku, ndàayi, pa buloba bujimà nùkayiiishè Evanjeeliyo."

Éyi Mwânà wa mukooko munanga uvwa
upùnga ne lufù, Mashi Èbè a mushinga
mukolè
Kaadyàkujimijakù bukolè bwàwù to,
Too ne pùikalà Ekeleeziya mujimà mupikula wa
Nzambi awu
Ne cya kusùngidiibwa, kàyikù mwa kwenza
kabidi mpekaatu to.

⁸⁸ Tùkwàcìshèku, twétù bu bambi, bwa kumòna ne tudi tulòmba byàbúngì be; mutùdì ne cya kwikala ne ekeleeziya, mutùdì ne cya kwikala ne *cikampànda*, mutùdì ne cya kwikala ne bintu byònsò.

⁸⁹ Bakàjì beetu, kumpàla kwa kuyabò mu ekeleeziya, pààbò bàdìbìikila beena Kilisto, bibàkèngela kwikala ne nkanzu wa mushindu kampànda, anyì kwikala bavwàle ne ku ménù.

Ne bayiishi bibàkèngela kupeta mfrangà búngì kampànda kumpàlà kwa bóbò kulwa, ne bikèngela bwa byònsò kwikalabi mushindu *kampànda*.

⁹⁰ Éyì Kilisto, pàndì mbala kaaba aka: “Mùvwàbo bàlalakana, bavwàle bisèbà bya mikooko ne bya mbuji, basòmbèle mu meenà a mu buloba, ne mu nyòngòlò, bàvwa bàlalakana, mu dikèngeshiibwa dikolè, kàdì, nansha nanku, bàakapeta Dìitabuuja,” mu mudimu wà bwambi wà banjelo, mmunyi mutwàpàndukà, pàdì Mukalenge Yesu mutùpèèshe nzùbù milenga, ne tùshinyì, ne bilàmbà, ne byàkudyà, kàdì eku twenda anu tunungana, tushààla basòmbè bashingè mikòlò, s’tudi beena lulèngù, katùyìkù tuteeta bwa kupàtuka bwa kuya kenza cintu kampànda pa bwalu abu to, mmunyi mutwàpàndukà’s, Nzambi wa yààyà?

⁹¹ Kaa, ndi ndòmbakù bwa Wèwè kutèèka ne kapyà ditwishìibwa dya cyena-kale mu mwoyi wònsò, mu dinda emu, Mukalenge, bwa bantu bàkatamukèku ne bàditwè mu mudimu. Tùkwatèku mudimu pàdì muunya mucìkàle wùteema apa, bwalu díbà didi dyènda dipweka lukàsà. Ne dishidimuka ki kuyadì eku, ne kakwàkwikala kabidi cikondo to. Necibwelakanè mu Cyendeleele.

⁹² Éyì Nzambi, enzàku bwa leelu ewu twàya ne mmwènenu mupyamùpyà, ne lungènyi, ne lumvu, bwa kumanya mwa kuseemena pàdì bangènzàmpèkààtù ne kubàfikisha lukùdì Kilisto. Tèèlejàku disambila dya musadidi Webè, Mukalenge.

⁹³ Ndi nkonka, ní kùdikù muntu kaaba aka, udi kàyì mumanyè Kilisto bu Musùngidi wendè, udikù mwa kwela cyanza muulu wàmbè ne: “Wamvùlukakù, Mwanèètù Branham” anyì? Udikù anu mwa kwela cyanza muulu, kwamba ne: “Wamvùlukakù. Ndi muswè kwikala mwena Kilisto. Ncyèna muswè kucilèngulula kabidi to” anyì? Nzambi àkubènèshè, paanyimà pààpa, mukalenge. Kùdì mukwabo anyì? Ambà ne: “Ndi muswè kwela cyanza cyànyì muulu, Mwanèètù Branham. Ne ndi muswè kwitaba Kilisto, bu Musùngidi wanyì, ntu anu mulèngùlùle, misangu yònsò. Kaa, ntu nya mu ekeleeziya, cya bushuwa, ntu wa mu ekeleeziya.”



EBÈLÙ, NSHAPÌTÀ MWIBÌDÌ 1 LUA57-0825M
(Hebrews, Chapter Two ¹)

DILONDANGANA DYA MALONGESHA PA MUKÀNDÀ WÀ EBÈLÙ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu mu dinda, mu matùkù 25 a ngondo wa mwandamukùlù, cidimu cya 1957, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org